


TEZAU LITURGIC
7 MARTIE

SLUJBA
SOBORULUI
SF. CHERSONULUI



MOSCOVA, 2000



Служба

СОБОРУ ХЕРСОНСКИХ СВЯТЫХ НА ВЕЛИЦЕЙ ВЕЧЕРНИ

На Господи, возвах: Стихиры, глас 8

Лик праведных твоих, Господи, / на Небесех
украсися / прославлением собора Херсонских
святых, / ихже и на земли Церковь воспеваает, /
тех убо молитвы о нас приими, Человеколюбче, /
яко имеяй велию милость.

Все отложивше житейское томление / и сладость
текущую презревше, / святии земли
Херсонския, / крест взясте, яко иго
божественное, / и Христу последовасте, / в
Небесный покой чудно вселистесе, / приидите к
нам, яко скории помощницы, / сподобляюще
даров невестественных / и молящесе о нас
усердно, / праздник ваш совершающих
святолепно.

Неувядаемыми венцы венчались есте / от руки
Вседержителя Бога, / святителие, мученицы,
преподобнии / и праведнии Херсонския земли. /
Сего ради и мы имамы ходатаев Небесных, /
ихже усердно молим: / помозите нам подвигом

добрым подвизатися / и веру Православную
соблюсти.

Слава, глас тойже:

Радуйся, Церковь Херсонская, / во святых своих
дивно прославляясь: / ты бо, благодать
изобильну от Господа стяжавши, /
постничеством и мученичеством, / проповедию
слова Божия / и хранением истины
Православия / воистину прославилася еси. /
Сего ради, ныне светло праздник твой
совершающе, / молим Отца и Сына и Святаго
Духа / помиловати души наша.

И ныне, Богородичен, глас тойже:

Царь Небесный за человеколюбие на земли
явися, / и с человеки поживе: / от Девы бо
Чистыя плоть приемый / и из Нея прошедый с
восприятием, / Един есть Сын, сугуб естеством,
/ но не Ипостасию. / Темже, совершенна Того
Бога / и совершенна Человека воистину
проповедающе, / исповедуем Христа Бога
нашего: / Егоже моли, Мати Безневестная,
помиловатися душам нашим.

Вход. Прокимен дне.

Чтения 3.

Пророчества Исаина чтение:

Также глаголет Господь: вси языцы собращася вкупе, и соберутся князи от них, кто возвестит сия в них? Или, яже от начала, кто слышана сотворит вам? Да приведут свидетели своя и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и отрок, егоже избрах, да познаете и веруете Ми, и разумеете, яко Аз есмь; прежде Мене не бысть ин бог и по Мне не будет. Аз есмь Бог, и несть, разве Мене, спасаяй. Аз возвестих и спасох, уничижих, и не бе в вас чуждий. Вы Мне свидетели, и Аз Господь Бог. И еще от начала Аз есмь, и несть от рук Моих избавляяй; сотворю, и кто отвратит то? Сиче глаголет Господь Бог, избавляяй вас Святыи Израилев.

Премудрости Соломоновы чтение:

Праведных души в руце Божией, не прикоснется их мука. Непщевани быша во очесех безумных умрети, и вменися озлобление исход их, и еже от нас шествие - сокрушение; они же суть в мире. Ибо пред лицем человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко

злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут: судят языком, и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломоновы чтение:

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение Свое и вооружит тварь в месть врагом. Облечется в броня правды и возложит шлем, суд нелицемерен. Приимет щит непобедимый преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят. И, от каменометныя ярости исполнь, падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и

разумейте, навыкните, судии концев земли,
внушите, держащие множества и гордящиеся о
народех языков, яко дана есть от Господа
держава вам и сила от Вышняго.

На литии стихирь, глас 4:

Украсися доме церковный, / прииде день
торжества святого - / память мужей и жен
богомудрых, / положивших в житии своем
основание / Христа Жизнодавца.

Вернии раби и мудрии Господа своего, / Иже
поставив вас над имением / и, призрев в
нощныя стражи жизни сея / и обрет неусыпно
бдящих, / введе в Чертог радости Своея. /
Темже молим вы: / не престаите подающе нам
пищу благодати Божия / во время свое
ходатайствы вашими / и молящися Господеви
помиловати души наша.

Слава, глас 8:

Мужайся, Церковь Христова, / и державствуй
над всею борющимися! / Христови бо друзи о тебе
пекутся, / и предстояще, и обстояще, / ихже
общий праздник ныне / совершаеши светло.

И ныне, Богородичен, глас тойже:

Безвестная Дево, / Яже Бога неизреченно
заченши плотию, / Мати Бога Вышняго, / Твоих
рабов мольбы прими, Всенепорочная, / всем
подаючи очищение прегрешений, / ныне наша
моления приемлющи, / моли спастися всем нам.

На стиховне стихиры, глас 4:

Всех святых, в земли Херсонской
прославльшихся, / верою, любовью, духом, /
чистотою и смирением, / благочестным житием,
доброделанием и молением / Богу угодивших и
святостию украсившихся, / днесь, совершающе
светлое торжество / и возносяще молитву к
прославльшему вы Христу Богу нашему, /
молимся прилежно, / да вашими молитвами /
дарует Господь душам нашим мир и велию
милость.

Стих: Дивен Бог во святых Своих, Бог Израилев.

Наста днесь великое торжество в крае нашем, /
прославляем бо всех Херсонских святых, /
многими воистину дела и словеса Богу
послужиша, / ныне же прославльшему их
Христу предстояще, / молятся о нас прилежно, /
любвию совершающих святую память их.

Стих: Святым, иже суть на земли Его, удиви
Господь вся хотения Своя в них.

Днесь, вернии, похвальными венцы / венчаем
вся святых Церкви Херсонския, / Престолу
Божию предстоящая / и милостивно нас
посещающая, / страны наша хранители, /
веры истинныя в ней утверждение,
/ православных поборники, / ихже молитвами /
возношение врагов наших Христос Бог низложи,
/ имей велию милость.

Слава, глас 8:

Память святых Херсонския земли совершающе,
/ Церковь Русская духовно радуется / и молится
ко Спасу Христу: / ихже молитвами спаси люди
Твоя / и благослови достояние Твое.

И ныне, Богородичен, глас тойже:

Небеса ныне радуются / и земля с человеки
веселится, / днесь бо Святая Херсонская
Церковь / совершает духовное торжество, /
прославляющи всех святых, в ней просиявших,
/ ихже молитвами и Богородицы / Церковь и
страну нашу в мире сохрани, / Многомилостиве.

Тропарь, глас 4:

Церкве Христовы светильницы, / истиннии хранителие апостольских преданий, / святии вси земли Херсонския, / приснии наши молитвенницы и заступницы, / молитв Владыку Христа Бога нашего / мир и благоденствие отечеству нашему даровати / и душам нашим велию милость.

НА УТРЕНИ

На Бог Господь: тропарь тойже.

По 1-й кафизме седален, глас 2

Солнце правды, Христос, вас посла, якоже лучи, просвещающия землю Херсонскую, угодницы Божии, от рода нашего просиявшия. Темже молитв Его, святии, облажащй нас ныне облак неверия разгнати и даровати нам мир и велию милость.

Слава и ныне, Богородичен:

Под кров Твой, Пречистая Дево, прибегающих мольбу принеси о нас Человеколюбцу Христу Богу, во еже спастися рабом Твоим.

По 2-й кафизме седален, глас 4:

Яко солнца светлая, во тьме греха показастесья концем, святии чудотворцы Херсонстии, просвещающе бо верныя, согреваете тех к Божественней любви и, яко котвы крепкия, во время треволнения утверждаете колеблющаяся в вере сердца.

Слава и ныне, Богородичен:

Красоте девства Твоего и пресветлой чистоте Твоей Гавриил удивися, вопияше Ти, Богородице: кую Ти похвалу принесу достойную? Что же возъименую Тя? Недоумеваю и ужасаюся! Темже, яко повелен бых, вопию Ти: радуйся, Благодатная.

Величание:

Величаем вас, / преславнии чудотворцы земли Херсонския, / града нашего небеснии заступницы, / и о душах наших усерднии молитвенницы.

Псалом избранный: Благо есть:

По полиелеи седален, глас 5:

Светло совершающе настоящее торжество, восхвалим угодники Божия, землю Херсонскую

благочестием озарившия, и веру Православную в ней утвердившия, и ко Отечеству Небесному путь нам указующия.

Слава и ныне, Богородичен:

Пречистая Богородице Дево, помилуй нас, прибегающих к Тебе с верою и просящих теплаго Твоего заступления: можеш бо, яко Благая, всех спасти матерними Твоими молитвами.

Прокимен, глас 4: Радуйтесь, праведнии о Господе, / правым подобает похвала.

Стих: Буди, Господи, милость Твоя на нас, якоже уповахом на Тя.

Евангелие от Матфея, зачало 10.

По 50-м псалме стихира, глас 6:

Ныне лик всех святых, / в земли Херсонстей просиявших, радуется, / Небесное Царство наследовавше / и Христа славяще, / яко раби Его бывше, / всельшиися в жизнь вечную, / за еже на земли свято поживше, / ихже молитвами, Христе Боже, / помилуй и спаси нас.

КАНОН, глас 8

Песнь 1

Ирмос: Воду прошед, яко сушу, / и египетскаго зла избежав, / израильтянин вопияше: / Избавителю и Богу нашему поим.

Припев: Все святые земли Херсонския, молитесь Бога о нас.

Воспойм согласно все в песнях духовных во благочестии просиявшие божественные отцы и матери наша, освятившие землю Херсонскую, яже Церковь Православная воспита.

Празднующе ныне память всех святых, в земли Херсонстей просиявших, верою, любовью и благочестием благоугодивших Господеви, молитвенного ходатайства о нас пред Богом усердно просим.

Духовный лик составльше, вернии, славные отцы и матери песнями почтим, светильники Церкви Херсонския, озаряющие сердца верою и любовью совершающих память их.

Богородичен: Пресвятая Владычице Богородице, помолися за ны Богу со всем собором Херсонских святых, да спасет Господь души наша.

Песнь 3

Ирмос: Ты еси утверждение притекающих к Тебе, Господи, / Ты еси Свет омраченных, / и поет Тя дух мой.

Светло совершаем торжество ваше сие и достойно почитаем вы, угодницы земли Херсонския, Богу угодившии и на Небесех со всеми святыми прославленнии.

Благодарим языцы, тобою просвещшиися и от земли на Небеса тобою, Апостоле Христов Андрее, возведеннии, служения бо вражия отступльше, быхом сопричастницы святых Ангел, Господния же славы общницы.

Радуюся, вшел еси, отче Капитоне, в пещь, пребыл же еси неопалим, якоже отроцы трие, неверныя изымая огня будущаго, веровавшия Божественным твоим чудесем.

Богородичен: Иконы Твоя Касперовския явление, Богородице Пренепорочная, славословим днесь и Твое заступление празднуем: яко бо Мати сущи Живота, молиши о нас Сына Твоего и Бога нашего, на Тя упование и надежду возложивших.

Седален, глас 2:

Яко солнце светлое, возсия честная память святых земли Херсонския, освещающи и согревающи сердца наша, паче же призывающи подражати житию их и ревности о вере.

Слава и ныне, Богородичен:

Пречистая Богородице Дево, помилуй нас, прибегающих к Тебе с верою и просящих теплаго Твоего заступления: можеш бо, яко Благая, всех спасти матерними Твоими молитвами.

Песнь 4

Ирмос: Услышах, Господи, / смотрения Твоего таинство, / разумех дела Твоя, / и прославих Твое Божество.

Ангели земнии и человецы Небеснии, звезды всесветлыя неба церковнаго, похвалы наша примите и во Православии утвердите чада ваша духовныя.

Проповедниче Бога Слова изрядный явился еси, отче, сердца верных просвещающи спасительными смыслом, темже и нас к познанию истины настави и сердца наша

светом веры просвети, Иннокентие преславне,
земли нашея новый Златоусте.

Наставниче и молитвениче наш, отче Прокопие,
со иереем Иоанном, сподвижником твоим, и
новомученики прииди, стани с нами; днесь бо
празднуем честную память вашу.

Богородичен: Ты Едина Богу, всяческая
мудростию создавшему, Мати позналася еси
Неискусобрачная, Дево Пречистая, темже Тя
Ангели и человецы песньми величают.

Песнь 5

Ирмос: Утренююще, вопием Ти: / Господи, спаси
ны, / Ты бо еси Бог наш, / разве Тебе, иного не
вемы.

Ничтоже возлюбивше на земли паче Зиждителя,
прияли есте труды и подвиги любви ради
Христовы, темже сподобилися есте наследия
праведных; молитесь Христа о нас, почитающих
память вашу.

Вслед Христа последовал еси радуящися,
носящи крест свой на раме, исповедниче
прехвальне Варсонофие: мучителей бо не
убоявся, силою Креста укрепляемь.

Землю Херсонскую яко апостольский жребий приемши, Христа проповеданием, неустанною молитвою и подвиги исповедническими собор новомучеников и исповедников Русских светолепно украсил еси, отче преподобне Варсонофие.

Богородичен: Надеждо и Предстательство Тебе поющих, яко Владычица Чистая, Пречистая Богородице Дево, едина Всепетая, моли во еже спастися нам.

Песнь 6

Ирмос: Молитву пролию ко Господу / и Тому возвещу печали моя, / яко зол душа моя исполнися / и живот мой аду приблизися, / и молюся, яко Иона: / от тли, Боже, возведи мя.

Страстей прилози и многия печали и беды обуревают нас: утешение нам подайте, святии, к Богу вашими молитвами.

Помянем, братие, како Божию благодатию благоверный Феодор во граде Херсонстем душу свою за ближних своих полагает, и от смертоносныя болезни многих спасает, и любовь злым и благим людем являет.

Ни молва мирская, ни чины и награды, ни слава тленная твоя яже по Бозе простоты уставиша,

Феодоре, но благоволил еси воистину
Божественным деянием.

Богородичен: Души наша, зноем греховным
истаявшия, напой водами животочными, Дево,
яко да класы плодоносны возрастим, Чистая,
Божественнаго умиления.

Кондак, глас 5

Святии чудотворцы Херсонския земли, / иже
ангельским житием просиявше, / Божественных
сподобистеся даров, / Спасу служаще со Ангелы
непрестанно, / молитве избавитися нам от
всякаго прегрешения / и душам нашим
даровати велию милость.

Икос

Приидите, постническое сословие, приидите,
чистоты рачителие, приидите, празднолюбцы,
всяк возраст, песньми духовными похвалим
наших молитвенников, в них имуще постников
похвалу, молчальников удобрение, печальных
утешителей, болящих посетителей и сущим в
бедах скоропослушных помощников, точащих
всем исцеления обильно, обретоша бо благодать
чудес Божиим велением и молятся душам
нашим даровати велию милость.

Песнь 7

Ирмос: От Иудеи дошедше отроцы, / в Вавилоне иногда, / верою Троическою пламень пещный попраша, поюще: / отцев Боже, благословен еси.

Милосердия бездну прострите нам, блаженнии, призывающим вас на помощь, вы бо у Милосердаго Бога дерзновение велие стяжали есте.

Девственными добротами просвещена, богоблаженная Евтропие, Чистому Слову уневестила еси, поживши пощением божественне, и Того живоносным стопам последовала еси, умерщвление страстей претерпевши.

Божественных отец наказанию последовала еси, славная Евтропие, и сих нраву чисте поревновала еси, воздержанием яко безплотна, и чистотою, и девством поживши, преподобная, и истинным смирением.

Богородичен: Едину в женах Благословенную Богородицу, яко Божие селение преблагоепно, вси радостию прославим.

Песнь 8

Ирмос: Царя Небеснаго, / Егоже поют вои Ангельстии, / хвалите и превозносите во вся веки.

Исцеления источаете, Божии угодницы, всем к вам притекающим любовь и вопиющим: превозносимый отцев Боже, благословен еси.

Яко светило светлое уготовала еси кроткую душу твою, блаженная мати Домнико, темже по смерти твоей многая исцеления недужным, от винопития и иных болезней душевных и телесных подаеши всем с верою имя твое призывающим и нелицемерно Творцу воспевающим: превозносимый отцев Боже, благословен еси.

Кротостию ко всем землю кротких наследовала еси, мати Домнико, милосердием и любовью ко ближним помилование от Бога получила еси, чистотою и целомудрием Бога зрети сподобилася еси, Емуже ныне со всеми святыми поеши: превозносимый отцев Боже, благословен еси.

Богородичен: Пречестную Твою икону Феодоровскую, Всепетая, неизреченными чудесы и благодатьми украсивши, в Херсонстей земли прославила еси; сего ради мы,

поклоняющесе ей, песнь благодарения Тебе приносим.

Песнь 9

Ирмос: Воистинну Богородицу, / Тя исповедуем, / спасеннии Тобою, Дево Чистая, / с Безплотными лики Тя величающе.

О велицыи сродницы наши, земли Херсонския заступницы, именованнии и непоименованнии, явленнии и неявленнии, Небеснаго Сиона достигшии и славу многу от Бога приимшии, утешение нам, в скорби сущим, испросите, веру нашу немощную укрепите и люди расточенныя соберите, от нас, яко дар, песнь благодарения приемлюще.

Небеснии граждане, святии земли Херсонския, не забудьте земное отечество ваше, яко на вас упование по Бозе и Богородице возложихом.

Днесь град Херсон вашу память празднует: сему бо явистесе столпи, и Божественная забрала, и утверждения, пастырие, и учителяе, и молитвенницы, Богоблаженнии.

Богородичен: О Дево Благодатная, грады и веси наша честнаго лика Твоего изображении, яко благоволения знаменьми, обогатившая, благодарение наше приими и от бед лютых

отечество наше избави, вси бо Тя, яко Покров всемогущий страны нашея, величаем.

Светилен, глас 3:

В песнях восхвалим светила земли Херсонския, таинники Христа, Божественнаго Слова, Иже сих просветившаго и возлюбившаго и помощники нам ко спасению даровавшаго.

Слава и ныне, Богородичен:

Пречистыя руце Твоя, Дево Мати, простерши, покрый уповающия на Тя и Сыну Твоему зовущия: всем подаждь, Христе, милости Твоя.

На хвалитех стихиры, глас 8:

Прехвальнии Херсонстии чудотворцы, / вас ни земля наша потаила есть, / но небо прият вы, / и отверзошася вам райския двери, / и, внутрь рая бывше, / древа жизни наслаждаетесь, / Христу молитесь / даровати отечеству вашему / мир и велию милость.

Приидите, празднолюбцы вси, / воспоем святых земли Херсонския, / сии бо явишася в последняя лета / слава и утверждение Православныя веры, / теплии предстателие наши, / немощствующих врачеве, / скорбящих утешение / и молятся, о еже спастися нам.

Святити сродници наши, / цвети духовнии земли Херсонския, / похвало наша, и утверждение, / и благоутишное пристанище, / вами Церковь наша хвалится, / стяжавши вас, яко неистоощимое сокровище, / жития же ваша и многая чудеса / прославляют прославльшаго вас Господа, / Егоже прилежно молитесь / даровати душам нашим велию милость.

Слава, глас 6:

Вси святити Херсонския земли: / святителие, мученицы, преподобнии и праведнии, / ныне прославляемии, / многая ваша имена, ведомая нам и неведомая, / на тверди церковней возсиявшая, / мир просвещаете / и от бед молитвами вашими нас сохраняете. / Мы же, сошедшеся днесь, / песненно восхваляем вас: / радуйтесь, святити вси, в земли Херсонстей просиявшии; / радуйтесь, славо и похвало Церкви и страны сия; / радуйтесь, столпи непоколебимии Святыя Церкви Христовы; / радуйтесь, веры утверждение, и мира умирение, / и теплии молитвенницы о душах наших.

И ныне, глас тойже:

Богородице, Ты еси лоза истинная, / возрадившая нам Плод живота, / Тебе молимся:

/ молися, Владычице, со всеми святыми земли Херсонския / помиловати души наша.

НА ЛИТУРГИИ

Прокимен, глас 4: Святым, иже суть на земли Его, / удиви Господь вся хотения Своя в них.

Стих: Сохрани мя, Господи, яко на Тя уповах.

Апостол ко Евреем, зачало 330.

Аллилуиа, глас 4: Боже, ушима нашими услышахом, и отцы наши возвестиша нам.

Стих: Спасл еси нас от стужающих нам и ненавидящих нас посрамил еси.

Евангелие от Матфея, зачало 11.

Причастен: Благоволит Господь в людех Своих и вознесет кроткия во спасение.

